

<><><><><><>

Encounter Basantgarh

उधमपुर जिले दे बसंतगढ़ इलाके च अज्ज बड़डलै सुरक्षाबलें ते आतंकवादिएं बश्कार टाक्करा होआ ऐ। साढ़े उधमपुर संवाददाता अचिन दुबे मूजब, इलाके च किश संदिग्ध नक्लोहरकत बारै जानकारी थोने परैन्त सुरक्षाबलें आसेआ उत्थे घेराबंदी अभियान चलाया गेदा हा जिस दरान आतंकवादिएं चानचक्क गोलीबारी शुरु करी दित्ता। सुरक्षाबलें बी तुरत मोर्चा सांभदे होई एहदा बनकदा परता दित्ता। इस बारै होर जानकारी बी अजें बलगेया जा'रदा ऐ।

<><><><><><>

AXIOM-4 Mission

भारती अंतरिक्ष जात्तरी ग्रुप कैप्टन शुभांशु शुक्ला हुं'दे कन्नै एक्सियम-4 मिशन अज्ज दपैहरी अंतर्राष्ट्री अंतरिक्ष केन्द्र पुज्जोग। भारती अंतरिक्ष अनुसंधान संगठन – इसरो मूजब, मिशन दा भारती समें मूजब सं'झां साङ्ढे 4 बजे पुज्जना तय ऐ। शुक्ला होर इस केन्द्र च पुज्जने आहले पैहले भारती बनी जाडन। राकेश शर्मा हुं'दे बाद शुभांशु शुक्ला होर अंतरिक्ष च जाने आहले दुए भारती बनी गे न। एक्सियम-4 मिशन च शुक्ला हुं'दे अलावा अमरीका, पोलैंड ते हंगरी दे अंतरिक्ष जात्तरी शामिल न। कल अंतरिक्ष यान दे टेक ऑफ दे किश मिनटें परैन्त शुभांशु शुक्ला होरें देशै लेई संदेस भेजेआ। उ'नें आखेआ जे 41 ब'रें परैन्त पही अंतरिक्ष च जाना उं'दे लेई बड़ा शानदार अनुभव ऐ। आकाशवाणी दे संवाददाता दी रिपोर्ट मूजब, प्रधानमंत्री नरेन्द्र मोदी होरें इस मिशन दी सराहना करदे होई आखेआ जे 140 करोड़ भारतवासिएं दिआं शुभकामनां ते आसां—मेदां, ग्रुप कैप्टन शुक्ला हुं'दे कन्नै न।

<><><><><><>

Satish – SANJY

औंदी श्री अमरनाथ जी दी सलाना जात्तरा दे मददेनजर, खुराक, सिविल सप्लाईज ते उपभोक्ता मामलें सरबंधी मैहकमे दे मंत्री सतीश शर्मा होरें कल बालटाल आहले आधार शिविर दा दौरा लाइयै जात्तरा गी बवस्थित ढंगै सिर करोआने लेई कीते गेदे बंदोबस्तें दा जायजा लैता। अपने दौरे दरान मंत्री होरें लंगर आहलें, श्रद्धालुएं ते होरनें सरबंधत घड़ें लेई जरूरी चीजें—बस्तें दी दस्तयाबी ते भंडारण दी समीक्षा बी कीती। मगरा मंत्री होरें सोनमर्ग च बक्ख—बक्ख मैहकमें दे ऐहलकारें कन्नै इक जायजा बैठक लाइयै जात्तरा मतल्लक तैयारिएं बारै जानकारी लैती।

<><><><><><>

Itoo SED Review

शिक्षा मंत्री स्कीना इत्तू होरें आखेआ ऐ जे हर इक बच्चे गी मय्यारी शिक्षा तोहड़ी पुज्ज दा अधिकार ऐ भामें ओह कुसै बी वर्ग जां इलाके दा रौहने आहला कीह नेई होऐ। मंत्री होर कल श्रीनगर आहले सिविल सचिवालय च इक उच्ची सतह दी बैठक दी प्रधानता करै करदि'आ हि'आं जिस मौके उ'नें स्कूली शिक्षा विभाग दी कारकरदगी दा जायजा लैता।

बैठक दरान स्कीना होरें ढांचागत विकास, अध्यापकें दी कारकरदगी, मनुक्खी संसाधनं दे प्रबंधन आहले खेत्तरें च हासल प्रगति दा व्यापक आंकलन कीता ते कन्नै बड्डी शैक्षणिक योजनाएं जि'आं समग्र शिक्षा, पीएम-पोषण, न्यू इंडिया लिटरेसी प्रोग्राम ते पीएम श्री दी अमल-आवरी सरबंधी स्थिति दी बी समीक्षा कीती। मंत्री होरें जम्मू-कश्मीर च शिक्षा दे मय्यार च बेहतरी लेई जोआबदेही, पारदर्शिता ते असरदार रणनीतिएं दे महत्त्व पर लोऽ पाई।

<><><><><><>

Int'l Day Against Drugs

अज्ज नशीले पदार्थे ते गैर-कनूनी तस्करी रोधी अंतर्राष्ट्री ध्याड़ा मनाया जा'रदा ऐ। एह ध्याड़ा नशीले पदार्थे शा मुक्त अंतर्राष्ट्री समाज दा लक्ष्य हासल करने लेई कार्रवाई ते सैह्योग मजबूत करने दा आह्वान करदा ऐ। इस मौके उपपर अज्ज नमीं दिल्ली दे डॉ. अंबेडकर अंतर्राष्ट्रीय केंद्र च इक कार्यक्रम आयोजित कीता जाह्ग। इस कार्यक्रम च केंद्री समाजी न्याऽ ते आधिकारिता राज्य मंत्री बी.एल. वर्मा मुख्ख परौहने होडन। प्रधानमंत्री नरेंद्र मोदी होरें अपने इक स्नेह च जंदी 12 जून थमां अज्जे तोहड़ी "नशा मुक्त भारत पंद्रवाड़ा" मनाने लेई नशीले पदार्थे दे नियंत्रण सरबंधी ब्यूरो -एनसीबी दी सराहना कीती ऐ।

<><><><><><>

PM MKB

प्रधानमंत्री नरेंद्र मोदी होर औंदे ऐतवारें 29 जून गी आकाशवाणी पर प्रसारित होने आहले अपने माहवार रेडियो कार्यक्रम "मन की बात" दे राएं देश-बदेश दे लोकें कन्नै बचार सांझे करडन। एह इस कार्यक्रम दी 123मीं किश्त होग जेहदा प्रसारण दूरदर्शन ते आकाशवाणी दे समूलचे नेटवर्क उपपर कीता जाह्ग। लोक इस कार्यक्रम लेई अपने बचार ते सुझाऽ टोल फ्री नंबर 1800-11-7800 पर सांझे करी सकदे न। एहदे अलावा लोक अपने विचार ते सुझाऽ नरेंद्र मोदी ऐप जां फही माई गोव ओपन फोरम पर बी भेजी सकदे न। सुझाऽ भेजने दी खीरी तरीक कल 27 जून ऐ।

<><><><><><>

Under 17 Womens' Wrestling

वियतनाम च 17एं ब'रें शा हेठली उम्री दिएं महिलाएं दी भारती कुश्ती टीम नै एशियाई कुश्ती चैंपियनशिप दा खिताब जित्ती लैता ऐ। भारती टीम नै सुन्ने दे 5 तगमें सने, चांदी दे 3 तगमें ते कैह दे बी 2 तगमें जित्ते न। कुल 10 तगमें दे कन्नै भारत नै इस प्रतियोगिता च पैहली थाहर हासल कीती जदके चीन नै दुई ते जापान नै त्रीऽ थाहर हासल कीती ऐ। एहदे शा पैहले वियतनाम च 23एं ब'रें शा घट्ट उम्री दिएं महिलाएं दी एशियाई कुश्ती चैंपियनशिप च बी भारती टीमै बड़ा असाधारण प्रदर्शन कीता हा।

<><><><><><>